

दिनांक 12.06.2025

समय: 18.45 बजे

व अहमदाबाद ऊं 242 मुसाफिरां ने लंदन ले जा रह्यो एयर इंडिया रो हवाई जहाज उड़ान भरण रा कुछ मिनटां पाछे ई हादसा रो शिकार व्ह्यो- राहत अर बचाव रा काम जारी।

व राष्ट्रपति, उपराष्ट्रपति अर प्रधानमंत्री समेत केई नेता हादसा माथे गहरो दुःख जतायो-दुनिया रा केई देशां रा नेता ई शोक जतायो।

व राजस्थान लोक सेवा आयोग रा नुवा बणायी ज्या अध्यक्ष यू.आर. साहू कामकाज संभाळ्यो।

व अंतरराष्ट्रीय योग दिवस री तैयारियां ज़ोरां माथे- देशभर मांय योगाभ्यास रा एके सागे एक लाख आयोजन व्हेला।

व प्रदेश मांय ज़ोरदार गर्मी - सरहदी ज़िलां मांय जिन्दगी माथे घणो असर पड़्यो।

000

गैर-सरकारी विमान कंपनी एयर इंडिया री अहमदाबाद ऊं लंदन जा रही यात्री उड़ान संख्या ए.आई-171 आज अहमदाबाद हवाईअड्डा कने हादसा री शिकार व्हे ग्यी। नागरिक उड्डयन महानिदेशालय रे मुजब हवाई जहाज मांय 242 मुसाफिर सवार हा अर विमान उड़ान भरण पाछे कुछ मिनटां मांय रिहायशी हलका माथे पड़ ग्यो। गिर गया। आं मांय 2 पायलट अर 10 केबिन क्रू ई शामिल है। एयर इंडिया कानी ऊं जारी पानडी रे मुजब विमान मांय 53 ब्रिटिश, 7 पुर्तगाली अर 1 कनाडाई नागरिक समेत 61 परदेसी मुसाफिर ई सवार हा। हादसा रा शिकार लोगां ऊं जुड़ी जाणकारी मुहैया करावण सारु विमान कम्पनी एयर इंडिया हॉट लाइन नम्बर 1800 5691 444 जारी कीना है। नागरिक उड्डयन मंत्रालय ई परिचालन नियंत्रण कक्ष खोल्यो है, जिण रा नम्बर 011-24610843 अर 96503-91859 है। मुसाफिरां री मदद अर पूछताछ सारु अहमदाबाद हवाई अड्डा माथे हेल्पलाइन नंबर 99741-11327 मुहैया करायी ज्यो है। ई बीचे एनडीआरएफ अर फायर ब्रिगेड री टीमां लगातार बचाव अर राहत रा काम कर रही है। हादसा मांय जख्मी लोगां ने अहमदाबाद रा सिविल अस्पताल मांय भर्ती करायी ज्या है। प्रधानमंत्री नरेन्द्र मोदी हादसा माथे गहरो दुःख जताता थकां गृहमंत्री अमित शाह अर नागरिक उड्डयन मंत्री राम मोहन नायडू ने फोन कर र जाणकारी लीनी। प्रधानमंत्री हालात रो जायज़ो ले र वां ने अहमदाबाद जावण सारु कह्यो। श्री मोदी गृहमंत्री अर नागरिक उड्डयन मंत्री ने हादसा री जद मांय आवण वाळां री तुरत हर-संभव मदद करण सारु कह्यो। श्री नायडू प्रधानमंत्री ने बतायो के वे बचाव अर राहत रा कामां री निगराणी सारु अहमदाबाद जा रह्या है। नागरिक उड्डयन मंत्री कह्यो के संबंधित एजेंसियां हाई अलर्ट माथे है।

000

राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेन्द्र मोदी, लोकसभा अध्यक्ष ओम बिरला अर लोकसभा मांय विपक्ष रा नेता राहुल गांधी हादसा माथे गहरो दुःख जतायो है। प्रधानमंत्री नरेन्द्र मोदी एयर इंडिया विमान हादसा ने दिल तोड़बा वाळो बतायो है। श्री मोदी कह्यो के वे हादसा री जद मांय आया लोगां री मदद सारु काम कर रह्या मंत्रियां अर अहलकारां रा सम्पर्क मांय है। प्रधानमंत्री कह्यो के दुःख री ई घड़ी मांय वां री संवेदना सगळा प्रभावित लोगां सागे है।

राज्यपाल हरिभाऊ बागडे हादसा माथे गहरो शोक जताता थकां मरण वाळां री आत्मा री शांति री प्रार्थना कीनी अर जख्मी लोगां रे बेगा ई ठीक व्हेवण री कामना कीनी। मुख्यमंत्री भजनलाल शर्मा ई हादसा रा शिकार व्ह्या लोगां रा प्रति संवेदना जताई है। दुनिया रा दूजा हलकां ऊं ई एयर इंडिया विमान हादसा पाछे प्रतिक्रियावां मिल रही है। ब्रिटेन रा प्रधानमंत्री कीर स्टार्मर सोशल मीडिया पोस्ट रे जरिये हादसा माथे दुःख जताता थकां कह्यो के दुःख री घड़ी मांय वां री संवेदना मुसाफिरां अर वां रा पिरवार वाळां सागे है। रूस रा राष्ट्रपति ब्लादिमिर पुतिन, ऑस्ट्रेलिया रा प्रधानमंत्री एल्बेनीज़ अर फ्रांस रा राष्ट्रपति मैक्रों ई हादसा माथे दुःख जतायो है।

एयर इंडिया रा चेयरमैन एन. चंद्रशेखरन ई हवाई जहाज़ हादसा माथे दुःख जताता थकां कह्यो के वां रो खास ध्यान प्रभावित लोगां अर वां रा पिरवार वाळां री मदद करण माथे है। चेयरमैन कह्यो के एक आपातकालीन केंद्र काम करण लाग्यो है। वे कह्यो के एयर इंडिया हादसा री ठोड माथे प्रभावित लोगां ने हर भांत री मदद अर देखभाल सारू पूरी ताकत ऊं काम कर रह्यो है। अहमदाबाद विमान हादसा पाछे देश मांय शोक रो माहौल है। भारतीय जनता पार्टी आज प्रदेश मांय व्हेवण वाळा केई कार्यक्रम रद्द कर दीना है।

000

केंद्रीय कृषि मंत्री शिवराज सिंह चौहान कह्यो है के विकसित कृषि संकल्प अभियान ज़मीनी लेवल माथे किसानां री परेशानियां अर चुनौतियां ने समझण मांय मदद करेला। वे ई अभियान रा समापन रे मौके आज गुजरात रा बारडोली मांय राख्यी ज्या किसान सम्मेलन मांय बोल रह्या हा। केन्द्रीय मंत्री भारत ने खेती रा हलका मांय आगे ले जावण री दिशा मांय केंद्र सरकार री योजना रो जिकर कीनो। श्री चौहान व्यापक विकसित भारत पहल रा विकसित कृषि संकल्प अभियान रा तहत वैज्ञानिक अनुसंधान रा एका माथे ज़ोर दीनो। श्री चौहान खेती-बाड़ी ने नुवो रुप देवण सारू केंद्र सरकार री छह-स्तंभ री रणनीति री चर्चा करता थकां भारत ने खुद रे पाण ऊबो भोजन रो वैश्विक बास्केट बणावण रा केंद्र रा संकल्प ने दोहरायो।

000

राजस्थान लोक सेवा आयोग रा नुवा बणायी ज्या अध्यक्ष यू.आर. साहू आज कामकाज संभाळ लीनो। अजमेर मांय आयोग रा दफ्तर मांय श्री साहू रो अहलकार अर कर्मचारी स्वागत कीनो। ई पाछे खबरनवीसां सागे बातचीत करता थकां श्री साहू कह्यो के आवता बगत मांय प्रतियोगी परीक्षावां मांय गोपनीयता और बधायी जावेला अर नौजवानां रो आयोग माथे भरोसो बरकरार राखण री कोशिश करी जावेला।

000

21 जून ने मनाया जावण वाळा अंतर्राष्ट्रीय योग दिवस रे मौके देशभर मांय एके सागे, योग ऊं जुड़्या एक लाख ऊं बत्ता कार्यक्रम राख्या जावेला। अ कार्यक्रम संवारे साढे छह ऊं सात बज र चालीस मिनट ताई यानि 1 घंटा 10 मिनट ताई सामान्य योग प्रोटोकॉल माथे आधारित व्हेला। योग दिवस रो ई साल रो मुद्दो **“एक पृथ्वी, एक स्वास्थ्य”** राख्यी ज्यो है। आज आयुष मंत्री प्रतापराव जाधव कह्यो के योग दिवस रो खास कार्यक्रम आंध्रप्रदेश रा विशाखापत्तनम मांय राख्यो जावेला। वे कह्यो के योग संगम री मेजबानी सारू देशभर ऊं 65 हजार ऊं बत्ता संगठन नाम मंडाया है।

11वां अंतरराष्ट्रीय योग दिवस रे मौके राज्य स्तर रो कार्यक्रम जयपुर रा सवाईमानसिंह स्टेडियम मांय राख्यो जावेला। राज्य मांय करीब 400 खास धार्मिक ठोडां, ऐतिहासिक महत्त्व री इमारतां अर सैर-सपाटा री ठोडां ई योगाभ्यास रा कार्यक्रम राख्या जावेला।

जिला, ब्लॉक अर पंचायत लेवल माथे ई योगाभ्यास रा कार्यक्रम राख्या जावेला। इण रे अलावा आयुष्मान आरोग्य मंदिरां, स्कूलां, सार्वजनिक बाग-बगीचां अर गैर-सरकारी संस्थावां समेत करीब 65 हजार ठोडां एक करोड़ जणां री भागीदारी रो लक्ष्य राख्यी ज्यो है। योग दिवस रे मौके व्हेवण वाळा कार्यक्रमां रो केंद्र सरकार रा योग संगम पोर्टल अर राज्य सरकार रा पोर्टल माथे पंजीयन कर्यो जावेला। मुख्यमंत्री भजनलाल शर्मा जनता ऊं बत्ती ऊं बत्ती तादाद मांय योग दिवस रा कार्यक्रम मांय भागीदारी करण री अपील कीनी है। मुख्यमंत्री ई बारा मांय जिला कलेक्टरां ने हुकम दीना है। उपमुख्यमंत्री अर आयुष मंत्री डॉ. प्रेमचंद बैरवा ई महकमा रा अहलकारां ने ज़रूरी तैयारियां करण बाबत् कह्यो है। सरकार जयपुर ग्रेटर नगर निगम री महापौर डॉ. सौम्या गुर्जर ने ई साल रा योग दिवस री ब्रांड एम्बेसडर बणायी है।

अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चलाई जा रही है। इण मांय आज पेश है जोधपुर रा डॉ. सर्वपल्ली राधाकृष्णन राजस्थान आयुर्वेद विश्वविद्यालय रा सह-आचार्य डॉ. चंद्रभान शर्मा रा विचार।

000

प्रदेश मांय पड़ रही ज़ोरदार गर्मी अर लू बीचे सरहदी ज़िलां मांय लगातार चढ़तो पारो रोजमर्रा री जिन्दगी माथे घणो असर कर रह्यो है। लारला चौबीस घंटां मांय श्रीगंगानगर सब ऊं गर्म ठोड़ रह्यो, जठे दिन री बगत तापमान 47 दशमलव 8 डिग्री सेल्सियस दर्ज करी ज्यो। म्हाणा खबरनवीस बतायो के ज़िला मांय पड़ रही झुलसा देवण वाळी गर्मी रे कारण लोग घरां ऊं बाहर नी निकळ सक रह्या है।

मौसम विभाग बीकानेर संभाग सारु काल बाबत् ई रेड अलर्ट जारी कीनो है। अलवर, भरतपुर, धौलपुर, झुंझुनूं, जैसलमेर अर बाड़मेर ज़िलां मांय लू रे कारण ऑरेंज अलर्ट जारी करी ज्यो है। महकमा रे मुजब रात री बगत ई पारो ऊंचो रह रह्यो है। मौसम महकमो जनता ऊं दिन मांय बाहर निकळती बगत सावचेती राखण अर पीवण री चीजां ज़रूरी तादाद मांय काम लेवण री राय दीनी है।